

Prednovogodišnji prijem u MVPBiH

# Ivanić demantovao priče o povlačenju ostavke

Ministar vanjskih poslova BiH **Mladen Ivanić** potvrdio je u utorak da su njegova i ostavka ministra **Branka Dokića** na funkcije u Vijeću ministara neopozive, demantujući tako špekulacije da bi odlazeći ministar vanjskih poslova BiH, uz određene uslove, mogao opozvati odluku o ostavci.

“Svoju ostavku neću povlačiti”, kazao je Ivanić i ukazao na nelogičnost komentara koji su u javnosti uslijedili nakon njegove ostavke.

“Prve reakcije bile su da je ostavka jedini logičan potez koji sam mogao poduzeti, a potom su uslijedile osude uz objašnjenje da ostavkom želim opstruirati reforme u BiH”, primijetio je Ivanić.

On je kazao da je zajedno sa



Mladen Ivanić: odgovornost i protest

Foto: A. KAJMOVIĆ

kolegama iz PDP podnio ostavku u Vijeću ministara zbog osjećaja odgovornosti i protesta zbog mjera koje je protiv RS i njenih zvaničnika poduzela međunarodna zajednica.

Ivanić je na svečanom novogodišnjem prijemu u Ministarstvu vanjskih poslova BiH novinarima jasno dao do znanja da naredne godine neće biti u prilici da im se obraća u funkciji šefa bh. diplomatije.

Az. K.

## Povučeno 80 diplomata

Ivanić je izjavio da je MVPBiH u protekloj godini završio značajan broj poslova, među kojima je istakao ispunjavanje gotovo svih uslova koji vode do početka pregovora o priključivanju i stabilizaciji sa EU. On je izrazio nadu da će u naredenoj godini biti utvrđen datum o početku pregovora između BiH sa EU.

Nadalje, istakao je da je unutrašnja organizacija MVP bitno poboljšana donošenjem niza internih akata, a značajne promjene desile su se i u bh. diplomatiji. Ivanić je kazao da je u proteklih 12 mjeseci sa funkcija u inostranstvu u zemlju povučeno 80 dipolomata, te da je na njihova mjesta u DKPBiH postavljen isti broj ljudi.

MUP i Ministarstvo odbrane RS

## Hagu dostavljena dokumentacija

BANJA LUKA - Ministarstvo unutrašnjih poslova i Ministarstvo odbrane RS, nakon višemjesečne istrage, polovinom decembra izvršili su akciju u kojoj je pronađeno 16 drvenih sanduka, koji sadrže više hiljada vojnih dokumenata iz ratnog

perioda, za sada nepoznatog sadržaja, saopšteno je u utorak iz MUP-a RS.

Dokumentacija je dostavljena Tužilaštvu Međunarodnog suda za ratne zločine u Hagu, gdje će se izvršiti detaljan uvid u sadržaj.

Prema riječima ministra odbrane RS **Milovana Stankovića**, riječ je o dokumentaciji koja je prije petnaestak dana kombijima prevezena iz Srbije, što je izazvalo dosta medijskih nedoumica na ovim prostorima.

“Dokumentacija se odnosi na prostore istočnog dijela RS, odnosno to je dokumentacija Drinskog i drugih korpusa koji su u toku rata djelovali na ovim prostorima”, kazao je Stanković.

On nije mogao da potvrdi da li ima još slične dokumentacije koja bi trebalo da bude proslijeđena Haškom tribunalu. Uglavnom, svi dokumenti su sada objedinjeni i Vojska RS, kako je kazao, već nekoliko mjeseci radi na arhiviranju tih materijala u skladu sa zakonskim propisima.

On je izrazio nadu da će i ovi dokumenti biti vraćeni Ministarstvu odbrane, jer je riječ o arhivi Vojske RS.

O. V.



Tribunalu proslijeđena dokumentacija o zbivanjima u istočnoj Bosni

Sastanak u Sarajevu

## Procesuiranje ratnih zločina u BiH

Procesuiranje ratnih zločina u BiH biće tema današnjeg radnog sastanka glavnih tužitelja iz cijele BiH, saopćilo je Tužilaštvo BiH.

Tokom sastanka u Sarajevu, kojem će prisustvovati glavni

kantonalni, okružni, entitetski i tužitelj distrikta Brčko, biće prezentirani predmeti “pravila puta” sa oznakom “A”, a učesnici ovog skupa će pokušati postići dogovor o rješavanju mogućih organizacionih problema u radu

na tim predmetima.

Sastanak će biti organiziran po radnim grupama, u skladu sa podjelom na pet timova u Tužiteljstvu BiH koji su zaduženi za procesuiranje ratnih zločina.

Bajazit Jašarević, premijer Tuzlanskog kantona

## Tuzla se mora otvoriti prema Sarajevu

TUZLA - “Nismo imali dovoljno pameti ni finansijskih resursa na koje bi se oslonili, ali smo imali jedinstven nastup u svim problemima i to je bio naš glavni oslonac”, kazao je na godišnjem okupljanju novinara premijer Tuzlanskog kantona **Bajazit Jašarević**, te posebno istakao zadovoljavajuće punjenje kantonalnog budžeta i odgovornost njegovim raspolaganjem.

Tuzlanski premijer izrazio je zadovoljstvo pokretanjem proizvodnje u nekim preduzećima ovog kantona, kao što su KHK Lukavac, te da su na dobrom putu da pokrenu proizvodnju slane vode na Rudniku soli *Tetima* kao daljeg razvoja hemijske industrije. Početkom naredne godine, kazao je on, stići će dobre vijesti o uvođenju strateškog partnera u Fabriku sode iz Lukavca, te pokretanju proizvodnje u *Polihemu*. Jašarević takođe smatra da su dobro uradili što su podržali pri-



Bajazit Jašarević

marnu poljoprivrednu i prehrambenu industriju.

On je istakao i provođenje reforme obrazovanja i pravosuđa.

“Tuzla i TK moraju biti otvoreni modernim saobraćajnicama prema Sarajevu i sjeveru naše zemlje”, kazao je na kraju Jašarević.

S. SMAJLOVIĆ

DGSBiH od 1. januara 2005.

## Telefonska linija protiv kriminala

Državna granična služba BiH od 1. januara 2005. godine pod sloganom *Stop prekograničnom kriminalu*, uvodi besplatnu telefonsku liniju 0800 51 000, koja će omogućiti brzu i efikasnu komunikaciju građana i službenika DGSBiH u interesu otkrivanja i sprečavanja prekograničnog kriminala i drugih nezakonitih radnji na granici.

Pozivom na broj 0800 51 000, građani iz svih krajeva BiH moći će anonimno, bez predstavljanja, dostaviti informacije o svim oblicima prekograničnog kriminala (nelegal-

ne trgovine, ilegalnih prelazaka granice, trgovine ljudima, krijumčarenje droga, oružja i eksploziva, nelegalnog prevoza u linijskom i vanlinijskom saobraćaju), te drugih nezakonitih radnji.

Ukazujući na eventualne protuzakonite radnje, ali i neprofesionalan odnos službenika DGSBiH, građani će na jednostavan i efikasan način dati svoj doprinos kontinuiranoj borbi DGSBiH protiv prekograničnog kriminala, korupcije i svih drugih vidova. Telefonska linija će biti dostupna 24 sata dnevno.

Projekti UNDP u Srebrenici



Srebrenica: većina novca uložena u elektrifikaciju

## Ove godine utrošeno više od 3 miliona dolara

SREBRENICA - U okviru Razvojnog programa Ujedinjenih naroda (UNDP) za realizaciju projekata dosad je za regiju Srebrenica uloženo 3.009.894 američkih dolara, navodi se u izvještaju UNDP, izvještava *Fena*.

UNDP na ovom području realizuje projekte sredstvima sakupljenim na međunarodnoj konferenciji održanoj u Njujorku 2002., a u ovoj godini većina projekata se u

Srebrenici implementira zahvaljujući vladama Velike Britanije, Japana, Italije, Norveške, te Vlade RS koja je za ovu regiju u 2004. osigurala 570.000 dolara.

Najveći dio sredstava uloženo je u elektrifikaciju i druge infrastrukturne objekte na području Bratunca, Milića i Srebrenice, za razvoj nevladinog sektora, razvoj lokalne uprave, ravnopravnost spolova.